

“GERRA GELDITU” ESKATZEAN NORI LAGUNTZEN OTE DIOZU: VLADIMIR PUTINI, MUNDUARI, NATO-RI, UKRAINARREI...?

Ukrainako gerraren kontrako protestak izan diren arren leku askotan, nabarmena da gerraren kontrako mobilizazioak motel dabiltzala munduan. Herritarrak ez ote dira ikaratzen gerra suntsitzailea Europan ikusita? Pare bat aste barru dena bukatuko dela espero dute? Ala telebista eta sare sozialek txikizioez zabaldutako irudiek blokatuta daude? Erantzukizunak eta erruak banatzeko eztabaidek paralizatu ditu, akaso?

 PELLO ZUBIRIA KAMINO

Iruñean apirilaren 9an pare bat zientzo herritar bildu zen “Intsumisioa, gerrei!” eta “Putin ez, NATO ez” aldarrikatzera. Gogoan eduki zuten Unai Salanueva, 1997an espetxera sartu aurretik bere buruaz beste egin zuen intsumisioa: “NATOn sartzearen eta derrigorrezko soldadutzaren aurka geundenak, berriz ere gerraren aurka atera behar dugu kalera”. Alegia, 1991n eta 2003an antimilitaristak gerraren aurka atera ziren izpirituz zetoze la Ukrainako gerrari aurre egitera, zehazki aldarrikapenok: aurrekontu militarrek ez handitu, Ukrainara armarik ez bidali, lagundu gerrak kolpatutako herritarrei, lagundu hilketan parte hartzeari uko egin dioten desertoreei eta Ukrainan bezala Errusian desobedientziaz eta bortizkeriarik gabe gerrari aurre egiteagatik agintarien errepresioa nozitzen dutenei.

Ukrainako gerrak albistegi guztiak monopolizatu dituen hilabete pare honetan ahots gutxi entzun da defenditzen gerrarekiko objektio eta intsumisioa. Frantzisko aita santu katolikoa izan da beste bat: “Lotsa sentitzen dut gastu militarra %2ra handitzen duten estatuekin, zoroak dira! Egiazko erantzuna ez dago arma gehiago, zigor gehiago eta aliantza politiko-militar gehiagotan”. Alabaina, mundu mailan feministak mobilizatu dira nabarmenen gerraren kontra, hainbat plataformatatik. Euskal Herrian, Emakumeak Gerraren Kontra taldea ARGIA mintzatu da *Patriarkatua eta kapitala, aliantza kriminala* agiriarekin. Mundu mailan, Bakearen eta Askatasunaren aldeko Emakumeen Nazioarteko Elkarte (WILFP ingelesezko sigletan) da adibide entzutetsuena. WILFPen buruetakoa den Carmen Magallónek sinatutako *Armek ez gai-*

tuzte salbatuko artikulua oihartzun zabala izan du: “Ikusita nola txalotzen den Europak Ukrainara armak bidaltzeko erabakia, nire ahots disidentea entzunaraziko dut: armek ez gaituzte salbatuko. Horren orde, sartuko gaituzte elkar hiltzeko zurrumbilo batean”.

Magallonek aipatu ditu Käthe Kollwitz margolari alemanak gerraren kontra egindako obrak. Kollwitzek, antza, bere bi seme bultzatu zituen I. Mundu Gerran borrokatzera eta bertan galdu. “Itoaldi horretatik sortu zitzaion emakumeari *Haziak ez dira errotan eho behar* koadroa, zeinetan gizonei esaten dien desertatzeko. Haziak dira gazteak. Beren betekizuna ez da hiltzea, bizitzea baino”.

Mundu mailako beste agiri erreferentzial bat da *Gerraren aurkako erresistentzia feminista*, hainbat feminista ezagunen –Nancy Fraser, Verónica

IRUÑEKO KARRIKETAN.

Apirilaren 9an "Intsumisioa, gerrei!" eta "Putin ez, NATO ez" aldarrikatu zuten.



EKINKUK

Gago, Teresa Rodríguez, Yayo Herrero, Keeanga Yahmatta Taylor...- sinadura-ekin zabaldu dena. "Jarraipena ematen diogu -diote- historian zehar gerra erreakzionarioen kontra parte hartu izan duen korrante feministari, hala nola 1914an [I. Mundu Gerraren aurrean] Rosa Luxemburg buru izan zuenari, 1980etan arma nuklearren kontra Greenham Commonen akanpatu zutenenari edo gerraren kontrako Beltzeko Emakumeen mugimenduari".

Argi eta garbi kondentatzen dute Vladimir Putinen erregimenak Ukraina inbaditu izana, NATO ere gerra honen errudun egiten dute, eta aldi berean "arbuizaten dugu gerraren espiralean sakontzearen alde egunotan hartu diren erabakiak, gatazkan arma gehiago sartu eta gerren aurrekontuak han-

**"Europak Ukrainara
armak bidaltzea
txalotzen da, baina
armek ez gaituzte
salbatuko"**

Carmen Magallón

ditzea". Errusian zenbait talde feministak daramaten lanarekin bat egiten dute eta Ukrainari zorrak kitatzea ere aldarrikatzen dute.

Hain zuzen ere, manifestu feminista hori izenpetzeari uko egin dion Catherine Samary ekonomialari feminista eta IV. Internazionaleko kideak *Ukrainako gerraren kontrako manifestu feminista zergatik sinatu ez duan* idatzian biltzen ditu gerraren aurkako mugimenduak gaur Mendebaldean bizi dituen blokeo eta eztabaiden zenbait gako. "Manifestua sinatzeko -dio Samaryk- eskaini zidatenei esan nienez, nik berdin errespetatzen ditut beren haurrak babestearren herrialdetik ihesi joandako emakume ukrainarrak eta herrialdearen defentsa desarmatuan edo armatuan parte hartzen gelditu direnak. Honek berekin dakar aitortzea han erresistentzia armatuan aritzea gerra justua dela, defentsako gerra, herri-izaera Putinek nabarmenki auzitan

jarri dion herri batek egiten duena. (...) Ukrainarren erresistentzia armatua arbuia eta bakearen eta negoziazioaren aldeko dei egitea praktikan da ukrainarrei Putinen nahietara makur daitezen eskatzea”.

Feminismoaren sailetik harago, ezkerreko mundu osoa dauka asaldatuta Ukrainako gerraren –agian zehatzago esanda, Errusiaren erasoaren– aurrean nola jokatzearen inguruko eztabaidak. Mila idatziren arteko beste bat aipatzearren, Europe Solidaire mugimendutik Mark Johnson eta Pierre Rousset saiatu dira laburbiltzen beren ustez Europako eta Mendebaldeko ezkerrean dauden erreakzioak: “Aurreko gatazketan bezala, sozialdemokrazia eta Berdeak NATOren akolito nagusi bihurtu dira. Ukrainaren inbasioaz geroztik, progresista batzuk Europar Batasunaren eta NATOren aldekoago bilakatu dira. Beste aldetik, ezker antikapitalistaren zati bat ez da gai

“Ukrainan erresistentzia armatua arbuia eta negoziazioaren alde dei egitea da Putinen nahietara makurtzeko eskatzea”

Catherine Samary

bere burua kokatzeko inperialismo ez-mendebaldar batek sortu duen gatazka batean. Burkideok ez dira ausartzen Errusiaren inbasioaren kritika epel

batetik harago joaten, uzkur dabilta elkartasuna Ukrainari ere erakusteko eta diote, ebidentzia ororen kontra, NATO dela errudun bakar edo nagusia, Ukraina dela Mendebaldearen txotxongiloa edo estatu proto-fazista bat eta egiazko biktima Errusia dela. Beren posizioa *kanpista* da: Mendebaldeko klase menderatzailearen kontra doazenak automatikoki babesten dituzte. (...) Elkartasunaren abiapuntuan egon behar du gerra baten biktima diren herriak defenditzea. Korrante *kanpista* ez da gai Ukrainako herriarekiko elkartasunez aritzeko geopolitikaz dauzkan ideia desbideratuengatik”.

Ilido berean, ezker hispanofonoan ondo ezaguna den Santiago Alba Ricok idatzi du: “Hona paradoxa: inbasio hasi zena gerra bihurtu da ukrainarren erresistentziari esker. Independentzia gerra bat da. Lehenetasunezkoa da gerran NATO ez sartzea; lehenetasunezkoa da Ukrainaren independentzia



"GERRAN EZ DA IRABAZLERIK"

Manifestazioa, Bukaresten, otsailaren 24an, Errusiak inbasioa hasi zuen egunean. "Gerran ez da irabazlerik" dio erdiko emakumearen idatziak.

TWITTER



ERRESISTENTZIA ARMATUARI LAGUNDU

"Errusiak borroka uzten badu, akabo gerra. Ukrainak borroka uzten badu, akabo Ukraina" afixa erakusten, New Yorkeko manifestazio batean.

KATIE GODOWSK

defenditu eta segurtatzea. Gure gerrazaletasunaren muga izan behar du saihestea nazioarteko gatazka eta gerra nuklearra; gure bakezaletasunaren muga, justizia eta zuzenbide internazionala berrestea".

Eztabaidaren beroa ikusita, pentsa daiteke Mendebaldeko ezkertiarren artean Ukrainak eragingo dituela 1956an Hungariaren inbasioak eta 1973an Txekoslovakiaren eragin zituzten adinako eten eta orbanak. Baina bitartean,

urri ikusten dira Ukrainan nola edo hala eta berehala su etena eta bakea ezartzea eskatzeko mobilizazioak. Hauek ez dira asko indartuko, baldin eta beren urteetako aliatu ezkertiarrek ere aurpegiratzten badiete bakea eskatzea dela Putinen aurrean errenditzeko proposatzea.

Lerrook idazteko egunetan, munduko ezkerraren hainbat korrontetatik su-etenaren eta irtenbide negoziatuaren aldeko ahalegin bat ari dira egiten, *Ukraina: Bakea orain!* manifestuaren in-

guruan, Noam Chomsky, Jeremy Corbyn, Rafael Correa, Yanis Varoufakis, Pablo Iglesias eta beste zenbait pertsonalitatek gidatuta. Paperetik karriketako mobilizaziora jauzi egitea lortuko ote dute?

Bitartean, herritarren gehiengoak Ukrainako txikizioa ikusten du telebisita eta sare sozialetan, porno militarra bailitza kontsumituz. Ahaztuz lehen Iraken, Sirian, Libian edo Yemenen ikusitakoak orain gertatzen ari direla hementxe bertan. ●



ZINKUNEGI
OPTIKA

Hernani 23 · 20004 Donostia
T. 943 420 624
www.zinkunegioptika.com



LAPIMA Eguzkitako betaurreko bilduma berria